

Mbanjcuengh Ndaw Lueg:

Boux Vunzbaz Ndeu “Aemq Hwnj” Seiq Aen Ranz

大山壮寨：一个女人“背起”四个家

□ Se Lunzgan/谢伦干

Cau Gveilanz, vunz Bouxcuengh, 63 bi, vunzmbanj Gveilanz Si Lungz-swnG Gak Cuz Swciyen Biuzlij Cin Gaicenz Cunh. Aen ranz Cau Gveilanz dwg aen ranz hung he, gwnz miz boux gyagoeng 90 bi ndeu, laj miz seiq boux lwgnyez ngamq ndaej geij bi, de dwg ndaw ranz boux vunzhong dog ndeu. Liengz Houyangz 10 bi, Liengz Libingz 9 bi, Vangz Cingzsi 5 bi, Vangz Ginhyungz 2 bi, seiq boux lwgnyez neix dwg gij lwg sam dah lwg de. Ciugqoq bouxlaux, daiq lwgnyez, hwnj bya raemj fwnz, dajndaem yienghyiengh cungj dwg de boux ndeu guh, Cau Gveilanz couh yienghneix dawz seiq aen ranz cuglamh youq giz ndeu.

Miz coenz fwen ndeu dwg baenzneix: “Lungzswng Gveilanz dwg diegbya, bya sang roen lingq dieg mbouj bingz. Bakdou daegbeix bya saekdimz, nuengxlingz yaek daeuj hoj youh nanz……” Aen ranz Cau Gveilanz couhdwg youq ndaw lueg byasang haenx. Yienznaeuz ranz gungz saedceij hoj, danhseih de caeuq bouxgvan de gamjcingz gig ndei, gyagoeng, gyabuz caemh dawz aen ranz guenj ndaej ndei. Gvanbaz de seng miz sam dah lwg, aeucoemq song daeg gwiz, saedceij bonjlaiz gvaq ndaej haemq swnh. Hoeng cib bi gonq

gyabuz caeuq bouxgvan de lienzdaemh gvaqseiq, diuzrap naekcaem ciugqoq saedceij daengx ranz couh daenz hwnj gwnz mbaq de.

Dahlwg hung doeg daihhag sat le, caeuq bouxgvan de itheij bae dieg rog guhhong. Danhseih, bohmeih lwggwiz hung cungj bingh gyad youq ranz, cienzbouh gauq sam boux lwg ciengx. “Lwggwiz hung youq ranz gou lo, danhseih ranz de caemh nanz, ndigah song ranz cungj aeu goq.” Cau Gveilanz doq danqheiq doq gangj.

Dahlwg ngeih caemh ciu le lwggwiz haeuj ranz, seizneix, gyogoengde caemh daengz yienhsingz guhhong lo. Dahlwg iq aenvih bingh Naujmozyenz bienq canz. “Mbouj rox gangj caemh mbouj rox guh saeh, nit ndat cungj mbouj roxyiuj.” Cau Gveilanz gangj dwk da hoengz sim sieng, de umj dahlwan Vangz ginhyungz gangj: “Ginhyungz daj seng roengz-daeuj couhdwg gou daiq lo, daxmeh de mbouj rox ciugqoq law.”

Goeng gyagoeng de 90 bi lo, miz binghfatmwnh, bouxlawz cungj mbouj roxnaj lo, cij rox siengjniemh dahlwg daeglwg de. Seiz fatbingh haenx, gyagoeng de hemq ra dahlwg, daeglwg daeuj buenx: “Daeglwg dahlwg cungj ndoj bae gizlawz la!” Miz seiz singqheiq gaenj hwnjdaej, buet bae

gwnz gai daejnauh. Seizhaenx, Cau Gveilanz doq uet raemxda doq riengz gyagoeng, siengj banhfap lox de ma ranz.

Sam dah lwg seng le seiq boux lwg, doxlwnz doxlien z gyau hawj Cau Gveilanz ciugqoq. Vih le fuengbienh hawj lwgnyez doegsaw, song boux lwggwiz doxcaeuq ciq le 7 fanh maenz, bae gwnz haw Biuzlij cawx le aen ranz gaeuq ndeu youq. Song ranz vunz youq dieg rog buekmingh guh hong boizcai. Ranz lwggwiz iq saedceij ceiq hoj, moix baez aemq haeux ma yawj Cau Gveilanz caeuq lwgnyez, caiq hix mbouj miz ngaenz hawj gyogoengde. Cau Gveilanz gangj: “Yawjraen dahlwg iq byoem fou lo, fwnGz naj cungj biegbembem, bouxgvan caemh gyaenz de, gou couh cuengqsim lo.” Gij hoj gij nanz saedceij hawj gwnz naj Cau Gveilanz hwnj nyaeuq haujlai, youq gij nyaeuq haenx, yawjraen le gij hoj gij naek saedceij, doengzseiz caemh gamhsouh daengz le caencingz raeujrub.

Ndaw ranz miz seiq boux lwgnyez, yienznaeuz cauzcauz nauhnauh, danhseih caemh gig nauhyied. Ngoenznaengz haetromh 5 diemj, Cau Gveilanz couh hwnqcong z bae dwk feiz cawj haeux, ndat raemx, soengq sam boux lwgnyez bae hagdangz.

Goeng gyagoeng cij gwn ndaej gijgwn cukcet, de dawz nohmou faeg mienz caeuq haeuxcuk itheiq aeuq. Caj gyogoengde gwn sat le, de cij ndaej-hoengq gwn geij gaemz. De sousib ndaw ranz, guh hongranz, lox laeq lwg'iq Vangz Ginhyungz sat le, vanzlij yaek bae gwn bya raemj fwnz roxnaeuz ndaem byaek. Gaenj guh menh ganj, seizgan gvaq ndaej gig vaiq, gyogoeng lwgnyez youh yaek cuengqhag ma ranz lo. Gyanghaemh, Swiqndang sat, gyogoeng lwgnye caeuq de ninz youq aen cong z hung ndeu, de dingq gyogoeng lwgnyez boih faenzcieng gobwnj, gangj gojgaeq, daengx ngoenz couh yienghneix gvaqbae lo.

Ndaejhoengq seiz, Cau Gveilanz bang gyagoeng de fei byoem, fei sat le, yungh sujbaq raeuj mad gij byoem nwnh deuz, gyagoeng de doiq aen gingq yawj le yawj bonjfaenh, riu dwk gig sim'angq. Gij bien aen gingq ndaw ding hwnj myaex lo, seiqhenz nem rim le gij ciengjcaeng gyogoeng lwgnyez. Cau Gveilanz naeuz: “Bouxbawx caemh dwg dahlwg bonjfaenh, lwggwiz caemh dwg daeglwg swheij.”

Cau Gveilanz gangj: “Suenq hwnjdaej, caiq gvaq 16 bi, dahlwan Vangz Ginhyungz 2 bi neix ndaej 18 bi le, gou cij ndaej yietnaiq lo.”



▲ Mbouj miz yezsuijgi, cij ndaej itmienh ndat raemx, itmienh hawj gyogoeng lwgnyez doxlwnz swiqndang.



▲ Cau Gveilanz bae gwnz bya raemj fwnz ma ranz.



◀ Cau Gveilanz itmienh swiqbuh itmienh coi gyogoeng lwgnyez sij cozyez.

▶ Cau Gveilanz bang gyagoeng fei byoem.

